



26. febrúar 2014

Fréttatilkynning vegna afkomu Fjarskipta hf. á 4. ársfjórðungi og á árinu 2013:

## Tekjuvöxtur og aukinn hagnaður

Ársreikningur Fjarskipta hf. fyrir rekstrarárið 2013 var samþykktur af stjórn og forstjóra félagsins á stjórnarfundum þann 26. febrúar 2014. Endurskoðendur félagsins hafa endurskoðað reikninginn og áritað hann fyrirvaralausri áritun.

Ársreikningurinn verður lagður fyrir aðalfund félagsins til staðfestingar þann 26. mars nk.

### Helstu upplýsingar:

- ✓ EBITDA hagnaður 4. ársfjórðungs nam 735 m.kr. og jókst um 22% milli ára
- ✓ EBITDA hlutfall tímabilsins var 21,4% en hagnaður nam 201 m.kr. og jókst um 280% milli ára
- ✓ Góð rekstrarafkoma á árinu í heild og traustur efnahagur í árslok
- ✓ EBITDA ársins 2013 nam 2.996 m.kr. og jókst um 8% milli ára
- ✓ Hagnaður ársins 2013 nam 847 m.kr.
- ✓ Eiginfjárlutfall félagsins var 49,4% í árslok

### Lykiltölur:

	4F 2013	4F 2012	Breyt.	% breyt.	2013	2012	Breyt.	% breyt.
Seldar vörur og þjónusta	3.430	3.327	103	3%	13.176	13.351	-175	-1%
Kostnaðarverð	1.882	1.977	-95	-5%	7.267	7.657	-390	-5%
Framlegð	1.548	1.350	198	15%	5.909	5.694	215	4%
Rekstrarkostnaður	1.189	1.146	43	4%	4.364	4.450	-86	-2%
EBITDA	735	601	134	22%	2.996	2.768	228	8%
EBIT	359	204	155	76%	1.545	1.244	301	24%
Hrein fjármagnsgjöld	109	140	-31	-22%	491	663	-172	-26%
Hagnaður tímabilsins	201	53	148	280%	847	400	447	112%
Framlegð (%)	45,1%	40,6%			44,8%	42,6%		
EBITDA %	21,4%	18,1%			22,7%	20,7%		
EBIT %	10,5%	6,1%			11,7%	9,3%		



## Ómar Svavarsson, forstjóri:

„Rekstur Vodafone gekk vel á fjórða ársfjórðungi 2013. Allir mælikvarðar úr rekstrinum sýndu góðan árangur á tímabilinu og sterkur efnahagur félagsins styrktist enn frekar. Tekjur tímabilsins hækkuðu milli ára, EBITDA hækkaði, framlegð hækkaði, fjármagnsgjöld lækkuðu verulega og hagnaður tímabilsins nær fjórfaldaðist.

Afkoma ársins 2013 í heild var góð og í takt við útgefnar horfur. Við höfðum gert ráð fyrir talsverðum sveiflum milli ársfjórðunga og það varð raunin. Niðurstaða ársins er því vel ásættanleg. Framlegð hækkaði um 4% frá fyrra ári, EBITDA hækkaði um 8% og hagnaður ársins hækkaði um 112%. Fjárfestingahlutfall ársins var 10,3% sem var innan áður uppgefinna viðmiða. Fjárhagsstaða Vodafone í árslok var mjög sterk, skuldir höfðu lækkað og eiginfjárhlutfallið komið nálægt 50%.

Félagið varð fyrir mikilli ágjöf í framhaldi af innbroti á heimasíðu félagsins í lok nóvember, en við höfum gripið til margvíslegra aðgerða sem allar miða að því að styrkja félagið og koma í veg fyrir að mál af þessu tagi endurtaki sig. Við höfum einnig lagt okkur fram um að miðla af reynslunni, svo okkar reynsla nýtist samfélaginu öllu á tímum alþjóðlegrar netvár.

Við stöndum sterkari eftir tíðindamikið ár og hlökkum til að takast á við árið sem er framundan með þá reynslu í farteskinu.“

## Rekstrarafkoma á 4. ársfjórðungi 2013:

Tekjur samstæðunnar á 4. ársfjórðungi 2013 námu 3.430 m.kr. og hækkuðu um 103 m.kr. frá sama ársfjórðungi 2012. Mestu munaði um tekjur af sjónvarpsþjónustu, sem hækkuðu um 62%. Líkt og á fyrri fjórðungum ársins hækkuðu tekjur af gagnaflutningsþjónustu. Þessir þættir vógu upp minni tekjur af farsímaþjónustu, sem lækkuðu um 9% frá sama tímabili í fyrra. Kostnaðarverð seldra vara og þjónustu án afskrifta lækkaði um 51 m.kr. á milli ára og skýrist það m.a. af lækkun samtengi- og reikigjalda.


Framlegð fjórðungsins nam 1.548 m.kr. og hækkaði um 198 m.kr. eða 15% frá 4F 2012.

Rekstrarkostnaður félagsins á 4. ársfjórðungi 2013 nam 1.189 m.kr. og hækkaði um 43 m.kr. frá sama tímabili 2012. Helstu skýringa er að leita í auknum launakostnaði og öðrum rekstrarkostnaði, þ.m.t. hærri afskriftum og beinum kostnaði vegna innbrots á heimasíðu Vodafone.

EBITDA hagnaður tímabilsins nam 735 m.kr. og hækkaði um 22% frá sama fjórðungi 2012. Það er meiri EBITDA hagnaður en félagið hefur skilað áður á 4. ársfjórðungi. EBITDA hlutfall tímabilsins var 21,4%.



Mynd 1: EBITDA hagnaður eftir fjórðungum frá árinu 2009




Hrein fjármagnsgjöld á 4F lækkuðu um 22% milli ára og námu 109 m.kr. á tímabilinu. Lækkunina má rekja til lægri hreinna vaxtaberandi skulda miðað við sama tímabil í fyrra.

Hagnaður fyrir tekjuskatt nam 250 m.kr. og hækkaði um 291% frá 4. ársfjórðungi 2012. Reiknaður tekjuskattur nam 49 m.kr. og hagnaður fjórðungsins nam 201 m.kr., sem er hækkun um 280% frá fyrra ári.

### Sjóðstreymi 4. ársfjórðungs 2013:

Handbært fé í lok fjórðungsins nam 335 m.kr. og var umtalsvert lægra en á sama tíma 2012.

Undir lok 3F samþykkti stjórn Fjaraskipta hf. stefnu um stýringu á lausafé, þar sem markmiðið er að hámarka ávöxtun. Í samræmi við fjárfestingarstefnuna var á 4F gengið frá samningum um nýja rekstrarlánalínu við viðskiptabanka félagsins upp á 1.000 m. kr. sem var varið til niðurgreiðslu á langtímaláni félagsins. Handbæru fé var varið til innborgunar á rekstrarlánalínu sem var ónýtt við árslok. Handbært fé frá rekstri nam 682 m. kr. á 4F og hækkaði um 17% frá sama tímabili 2012. Fjárfestingahreyfingar námu 548 m.kr.



### Rekstrarafkoma ársins 2013:

Rekstrartekjur ársins 2013 námu 13.176 m.kr. og lækkuðu um 175 m.kr. eða 1% milli ára. Kostnaðarverð lækkaði á sama tíma um 390 m.kr. eða um 5% og framlegð hækkaði því um 215 m.kr. eða 4% frá fyrra ári. EBITDA hagnaður hækkaði um 8% á milli ára og nam 2.996 m.kr. EBITDA hlutfall ársins hækkaði úr 20,7% í 22,7%. Hagnaður ársins nam 847 m.kr. og hækkaði um 112% frá fyrra ári.



## Sjóðstreymi á árinu 2013:

Handbært fé frá rekstri nam 2.178 m.kr. á árinu og lækkaði um 5% frá sama tímabili 2012. Það skýrist að mestu af breytingu á rekstrartengdum eignum og skuldum. Fjárfestingar námu 1.354 m.kr. eða 10,3% af tekjum. Handbært fé í lok tímabilsins nam 335 m.kr.

## Efnahagur 31. desember 2013:

Efnahagur félagsins er sterkur og jákvæð þróun hefur orðið á öllum helstu kennitölum efnahagsreikningsins á árinu.

Eigið fé félagsins var 7.584 m.kr. í lok ársins. Eiginfjárlutfall var 49,4% og hafði aldrei verið hærra. Heildarskuldir samstæðunnar voru 7.779 m.kr., þar af voru langtímaskuldir 5.654 m.kr. Hreinar vaxtaberandi skuldir námu 5.319 m.kr. og var hlutfall þeirra á móti EBITDA hagnaði ársins 1,8. Veltufjárlutfall var 1,3.

## Helstu tíðindi á árinu:

- **Nýjungar í þjónustu:** Ýmsar nýjungar voru kynntar á vöru- og þjónustuframboði á árinu. 4G þjónusta var hleypt af stokkunum og 3G þjónustusvæði félagsins var stækkað og kerfi eflað. Nýjar þjónustuleiðir í farsíma voru kynntar snemma árs, sala hófst á EuroTraveller sem tryggir ferðamönnum hagstæðari farsímanotkun á EES-svæðinu, sala hófst á Ljósneti Vodafone og sjónvarpsþjónusta var eflað með Tímaflakki. Sala á snjalltækjum jókst verulega á árinu og með samningi Vodafone við Apple var aðgengi tryggt að hinum vinsælum iPhone snjalltækjum sem seldust vel á síðustu vikum ársins.
- **Samningur við RÚV markaði tímamót:** Í mars undirrituðu Vodafone og RÚV samning um að Vodafone annist stafræna sjónvarpsdreifingu og reksturdreifikerfa Ríkisútvarpsins næstu 15 árin. RÚV valdi Vodafone eftir útboð sem fjölmörg fyrirtæki, innlend og erlend, tóku þátt í. Í samningnum fólst m.a. að Vodafone tryggji stafrænar útsendingar á tveimur háskerpurásamum fyrir RÚV til 99,8% heimila á landinu. Um tímamótasamning var að ræða, því hann er einn sá stærsti sem Vodafone hefur gert frá upphafi. Tekjur félagsins vegna þjónustunnar við RÚV verða um 4 milljarðar króna á tímabilinu og ætluð áhrif til hækkunar á EBITDA á ársgrundvelli um 3-5%. Uppbygging á sjónvarpsdreifikerfi Vodafone samkvæmt samningnum hófst þegar á árinu 2013. Slökkt var á fyrstu hliðrænu sendunum um haustið og fjöldi nýrra senda tekinn í gagnið.
- **Nýr sæstrengur mun valda straumhvörfum:** Vodafone samdi í ágúst við fyrirtækið Emerald Networks um afnot af nýjum sæstreng, EmeraldExpress. Strengurinn mun tengja saman Bandaríkin og Evrópu með tengingu við Ísland. Áætlað er að strengurinn verði tekinn í notkun um mitt árið 2015. Athygli er vakin á því, að áður hafði verið ráðgert að strengurinn yrði tekinn í notkun á árinu 2014, sbr. tilkynningu 9. ágúst 2013. Með honum margfaldast gagnaflutningsgeta Vodafone til og frá landinu, en þörfin fyrir aukinn gagnaflutningshraða og meiri afköst er sífellt að aukast.
- **Stefna Vodafone gegn Símanum vegna samkeppnislagabrota:** Í nóvember var tilkynnt að Vodafone hefði stefnt Símanum til greiðslu skaðabóta vegna brota á samkeppnislögum á árunum 2001 til 2007. Brotin fólust í ofrukkun á lúkningargjöldum. Síminn hafði áður gert sátt við Samkeppniseftirlitið vegna málsins. Síminn svaraði með því að gagnstefna Vodafone fyrir „sambærilegan meintan ólögmgætan verðþrýsting.“ Sá grundvallarmunur er á stefnum Símans og Vodafone, að stefna Vodafone á hendur Símanum fær stoð í niðurstöðu Samkeppniseftirlitsins og áfrýjunarnefndar samkeppnismála, en kröfugerð Símans á hendur Vodafone gerir það ekki. Gert er ráð fyrir að Héraðsdómur Reykjavíkur taki málið fyrir á árinu 2014.
- **Farsímadreifikerfi Vodafone og Nova rekin sameiginlega:** Síðari hluta árs ákváðu Vodafone og Nova að ganga til formlegra viðræðna um stofnun nýs rekstrarfélags sem mun reka sameinað farsímadreifikerfi félaganna tveggja. Með sameiningunni skapast mikil tækifæri til stækkunar og verulegt hagræði næst í fjárfestingum og rekstri. Einnig verður þétting og uppbygging kerfisins hraðari en annars væri mögulegt. Engin breyting verður á samkeppni félaganna á fjarskiptamarkaði. Samkeppniseftirlitið er með málið til umfjöllunar.
- **Innbrot á heimasíðu Vodafone:** Þann 30. nóvember 2013 var brotist inn á heimasíðu Vodafone og gögnum stolið þaðan. Þar á meðal voru 79 þúsund SMS skeyti og notendanöfn og lykilorð að þjónustusiðu



félagsins. Gögnin voru birt í kjölfarið á netinu og skapaðist mikil umræða um málið í samfélaginu. Ekki var brotist inn í sjálf fjarskiptakerfi Vodafone, Áhrif á afkomu félagsins voru óveruleg á árinu 2013. Ekki er ljóst hver langtímaáhrif málsins verða á félagið, m.a. vegna boðaðra dómsmála á hendur Vodafone vegna innbrotsins.

### **Horfur fyrir afkomu á árinu 2014:**

Stjórn Fjarskipta hf. hefur ákveðið að birta eftirfarandi horfur fyrir árið 2014.

- ✓ EBITDA hagnaður ársins 2014 verði á bilinu 2,9 til 3,1 milljarður króna
- ✓ Fjárfestingahlutfall verði á bilinu 10 til 12%
- ✓ Stjórn félagsins leggur til að ekki verður greiddur út arður vegna ársins 2013. Tillaga að arðgreiðslustefnu fyrir félagið verður lögð fyrir aðalfund sem haldinn verður 26. mars nk.

### **Kynningarfundur 27. febrúar 2014:**

Opinn kynningarfundur verður haldinn fimmtudaginn 27. febrúar 2014 í höfuðstöðvum félagsins að Skútuvogi 2. Á fundinum munu Ómar Svavarsson, forstjóri, Hrönn Sveinsdóttir, framkvæmdastjóri rekstrarsviðs, og Hrannar Pétursson framkvæmdastjóri samskiptasviðs kynna niðurstöður ársins. Kynningin hefst kl. 8:30 en boðið verður upp á morgunverð frá kl. 8:00.

Kynningarefni fundarins verður hægt að nálgast að honum loknum á síðu fjárfestatengsla Vodafone á [www.vodafone.is/fjarfestatengsl](http://www.vodafone.is/fjarfestatengsl)

### **Fjárhagsdagatal 2014:**

- |                                |                  |
|--------------------------------|------------------|
| ✓ Aðalfundur 2014              | 26. mars 2014    |
| ✓ Uppgjör 1. ársfjórðungs 2014 | 21. maí 2014     |
| ✓ Uppgjör 2. ársfjórðungs 2014 | 13. ágúst 2014   |
| ✓ Uppgjör 3. ársfjórðungs 2014 | 5. nóvember 2014 |
| ✓ Uppgjör 4. ársfjórðungs 2014 | 25. febrúar 2015 |

### **Frekari upplýsingar:**

- ✓ Hrannar Pétursson, framkvæmdastjóri samskiptasviðs, tekur á móti fyrirspurnum í gegnum netfangið [fjarfestatengsl@vodafone.is](mailto:fjarfestatengsl@vodafone.is) eða í síma 669-9310.